

и земля Резанская изменися, доброта ея и слава ея отиде, и не бе в ней ничто же благо видети, токмо дым и пепел. А церкви все погореша, а у великия церкви внутри погореша и почернеша. Сей же благоверный князь Ингорь⁹⁴ Ингоровичь Резанский ко греческим царем велику любовь имяше, и дары у них многия взимаше, и по браце целомудрено живяще, смотряще свое спасение. В чисте совести и крепости разумно предержа земное царство и небесному приближаяся. Плоти угодия не творя, соблюдаяще тело свое по браце греху не причастно. Государьски⁹⁵ сам⁹⁶ держа, а посту и молитв приближаяся, и кресты на раме своем ношаше. Честь и славу от всего мира приемлет, а во святых посты причащаяся святых таин. И многия труды и победы по православной вере показаста. А с погаными полцы часто бьяшеса за святых цркви и за православную веру и за отчину отца своего. От супостатов весь мир храняста, а милостыню неоскудно даючи, и ласкою своею⁹⁷ многих от неверных царей и детей их к себе принимаста, и на веру истинну обратиста. Благоверный же князь Ингорь⁹⁸ Ингорович, нареченны⁹⁹ во святом крещении Козма, сяде на столе отца своего великаго князя Ингоря¹⁰⁰ Святославича, и обнови землю Русскую,¹ и церкви постави, и монастыри заградил. Пришельцы² утешил, и люди собра. И бысть радость християном, их же избавил бог рукою своею крепкою от безбожнаго и зловернаго царя Батыя. Ныне и присно и вовеки веков,³ аминь.⁴ Справил Ивашко иконник Калашников.⁵

Редакция „Сказания“, краткий вид

Текст по списку Публичн. библ. Погодинск. № 1936

Сказания о пришествии на Рускую землю безбожнаго царя Батыя, и как он окояны разорил Резанское государство

В лето 6705-го году. Пришествие ис Корсуни чудотворнаго Николаина образа в 12 лета. За наше согрешение, попущающу богу; овогда глад бысть великий, иногда пожар и нашествие поганых и междуусобных брани, и абие приде царь Батый на Рускую со множеством татарским, и ста на реке на Воронеже близ Резанские земли. И посла он послы к великому князю Юрию Ингоревичу Резанскому, просяще у него десятины во всем княжени: в людех, и в конех. И услыша князь Юрья Ингоревич приход безбожнаго царя Батыя, и вскоре посла по братию свою по князя Давида Ингоревича Краснаго и по князя Олго Всеволодовича, и по князей месных, и по бояры, и по воеводы. И начаша советовати — како нечестиваго^a царя подобает дарами утолити. И посла сына своего князя Феодора Юрьевича, и иных князей многих к безбож-

^a В рукописи: нечести.

⁹⁴Ингор. ⁹⁵Государство. ⁹⁶сам. ⁹⁷съвоею. ⁹⁸Ингор. ⁹⁹нареченный. ¹⁰⁰Ингора.

¹Рускую. ²пришельцы. ³веком. ⁴⁻⁵нет.